

Regional News Unit AIR Aizawl
Friday, March 06, 2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Vice President C.P. Radhakrishnan chu vawiin hian zan khat riakin Mizoram a rawn tlawh dawn a, naktukah Mizoram University Convocation a hmanpui ang.
- Mizoram Legislative Assembly Budget Session thutkhawm ni 12-na chu vawiina neih turah Private Member Resolution sawiho a ni dawn a, IAF in Lengpui ram an lei chungchang sawiho a ni ang.
- Nimin khan Assembly session-ah minister pahnih Pu C Lalsawivunga leh Dr Vanlalhlana te department chana demand-te sawiho pass a ni.
- Prime Minister Narendra Modia chuan nimin khan French President Emanuel Macron nen inbiain tunlai khawvel thilthleng mek an sawidun.

<><><>

VICE PRESIDENT TO ATTEND MZU CONVOCATION

Vice President C.P. Radhakrishnan chu vawiin hian zan khat riakin Mizoram a rawn tlawh dawn a, naktukah Mizoram University Convocation a hmanpui ang.

Vice President in zan khat riaka Mizoram a rawn tlawh turah hian naktuk Inrinni chawhma dar 11-a MZU Convocation vawi 20na a hman pui dawn a, hemi zawh hian a let leh nghal mai dawn nia thudawn a ni.

Vice President lo zin tur chungchangah hian Chief Secretary Khilli Ram Meena hova thutkhawm niin venhimna kenkawh dan tur leh Vice President lo dawn sawn dan tur hrang hrang sawiho a ni a, Aizawl Superintendent of Police (Traffic) pawhin lirthei tlan dan tur tichhuakin khauh taka dan kenkawh ani dawn a ti a ni.

Vice President C.P. Radhakrishnan lo zin turah hian mawhphurhna nei te chu kil hrang hrangah nasa taka inbuatsaih niin state sawrkar chuan khauh taka venhimna ken kawh a tum a, Thuneitute sawi danin Vice President vawiina lo zin turah hian Lengpui atanga Vaivakawn kaltlanga Lok Bhavan kawngah zing dar 9 atanga tlai dar 5:30 inkarah kawngsira lirthei dah phalloh ani dawn a, Lok Bhavan atanga Chanmari inkarah pawh lirthei dah hi phal ani dawnlo a ni. Thuneitute chuan naktuk inrinni ah pawh zing dar 6 atanga chawhnu dar 2 inkarah Lok Bhavan atanga MZU Campus chu lirthei kawngsirah dah phalloh a ni an ti a, Aizawl Traffic Police chuan Aizawl Bypass Road (Sairang atanga Bawngkawh inkar) chu zing dar 7 atanga tlai dar 6 inkarah kawngsira lirthei dah phal anih loh thu an sawi bawk.

<><><>

ASSEMBLY – PRIVATE MEMBER RESOLUTION

Mizoram Legislative Assembly Budget Session thutkhawm ni 12-na chu vawiin hian Speaker Pu Lalbiakzama kaihhruaiin chhhunzawm leh a ni dawn.

Assembly thutkhawmah hian darkar khat chung zawhna leh chhanna hun hman anih hnu in Chief Minister Pu Lalduhoma chuan Sairang Village Council huamchhhunga Infantry Brigade KLP (Key Location Plan) ram lak dan chungchangah statement a nei dawn a, hemi hnu hian Private member resolution sawiho a ni ang.

Private member resolution sawiho turah hian a hmasa berah Dampa MLA Dr R. Lalthangliana Resolution “Indian Airforce in Lengpui ram an lei chungchangah dan bawhchhiatna nasa tak leh corruption a awm ngei nia lang hi mizoram mipui duhdan ang ngeiin CBI in an chhui theih nan Mizoram sawrkarin hma la nghal rawh se” tih chu sawiho ani dawn a ni.

<><><>

MSU

Mizo Students Union MSU chuan Staff Selection Commission (SSC) in kum 2024 a Border Security Force (BSF) hnuaiia Constable General Duty tur lakna exam an buatsaih ah, Mizoram state quota a mi 10 lak zinga mi 8 chu Mizo ni lo leh Mizoram mi ni lo an nih thu a sawi.

Nimin khan Aizawl Press Club-ah thuthar thehdarhtute kawmin MSU President B. Lalkhawngaiha chuan a, heng mi pa 8 te hian DC Aizawl leh DC Mamit atanga lakchhuah ni awm tak Residential Certificate an nei vek a, amaherawh finfiah tura tih a nih hnuah DC ten chhanglethin Residential Certificate hi a lem a nih thu an hriattir a, heti chung hian heng mite hian January ni 10, 2025-a training an zawm chu an chhunzawm zel tho a, January ni 24, 2026 khan training chu zovin, Jammu leh Kashmir lamah post vek an ni a ti.

Heng mite hian certificate lem chiang tak hmanga Mizoram quota an lo luah ve ringawt chu pawl an ti a, chhui chian a nih theih nan leh heng mite hi hremna pek ngei an nih theih nan thuneituten hma la thuai se kn duh hle a ni a ti bawk a, FIR an thehluh tur thu sawi telin Mizoram chauha thehlut lovin Enforcement Directorate, Regional Office Guwahati ah te an thehluh tur thu a sawi bawk.

<><><>

SESSION DEMAND

Nimin khan Assembly session-ah minister pahnih Pu C Lalsawivunga leh Dr Vanlalhlana te department chana demand-te sawiho pass a ni.

Minister te demand pass hi Pu C Lalsawivunga department enkawl pali - Art & Culture department tana demand cheng vbc 15.50 te, District Council & Minority Affairs department tana demand cheng vbc 689 point 17 te, Horticulture department tana demand cheng vbc 126 point 62 leh AH & Vety department tana demand cheng vbc 78 point 21 te pawm a ni a; Pu C

Lalsawivunga department enkawl palite demand hi a vaiin cheng vbc 910 point 50 a ni a,

Heng bakah hian Dr Vanlalhlana department enkawl pathum tan demand cheng vbc 2,244 point 12 pawm a ni bawk a; - School Education department tana demand cheng vbc 1919 point 25, Higher & Technical Education department tana demand cheng vbc 319 point 10 leh Information & Communication Technology department tana demand cheng vbc 5 point 77 te a ni.

<><><>

DR VANLALHLANA ISSUE

MNF Party Thalain Minister Dr Vanlalhlana bang tura an phutna chu ZPM chuan chhangin, Minister hian dan bawhchhiat a neih loh thu an sawi.

MNF Thalain nimina Aizawl Vanapa Hall kawta pungkawm chuan Education Minister Dr. Vanlalhlana chu a dept chan hneh lo leh thildiklo ti a puhin bang turin an phut a, Minister chu a awmna party ZPM MLA Chairman-na hnuaia Assembly Petitions Committee-in Restricted Tender hmanga contractor a thlan dan chu Eirukna lian tak leh dik lo tak a ni tih a finfiah a, cancel an phut angin sorkarin an cancel sak a ni an ti a, a MLA puite pawhin thup ngaihna awm miah loa a thilsual tih cancel leh ngei an phut hi cheng cheng vbc 22 leh nuai 48 chuang a ni an ti a.

Mizoram State University Bill 2025 Assembly a sawiho lain NEP 2020 angin Lungleiah Mizoram State University a dah theih loh thu uar takin a sawi a. A thusawi angin bill pawh passed a ni a, kum 1 pawh a liam hmam Cabinet rorel angin Mizoram State University chu Lungleiah suan a nih tur thu a puang leh lawi a, Cabinet rorel anga sawn a nih thu a sawi hnu daihah Cabinet in By Circulation-in an passed leh hnahnawh tih document atingin finfiah a ni thung a ni an ti a, tum hnih chiang taka Mizoram mipuite a bum avangin a ban an phut tih an sawi a ni.

ZPM Gen Hqr chuan MNF Thalain te hi thuchhuah siama chhangin, Higher & Technical Education Department chuan PM-USHA hnuaia hna thawh tur dan angin Open Tender a chhuah a, a chhanna enfiah a nih lain Tender chhangtu Contractor te atingin 'complaint' a awm a. 'Complaint' chu Committee on Petitions ah theihluh niin anni hian an chhuichiang a ni an ti a,

MNF Party chuan Dr. Vanlalhlana tihhniam tumin hma an la nasa ni a sawiin a Department chan thenkhat Minister dang hnena pek chungchang pawh amahin chak leh tha zawka department a enkawl theih nan ama ngen anga lak thenesak zawk a ni a, Chief Minister pawhin budget session kal mekah hian fiah takin a lo sawi vek tawh zawk a ni, an ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



GINGER

Mizoram sorkarin Sawhthing hralh hun a kalpui mekah, Secondary Collection Centre (SCC) 10 atangin sawhthing quintal 5,887 hralh a ni tawh.

Thla hlui February ni 2 atanga support price awma kut hnathawktuten sawhthing an hralh theih hun chhung tura a ruahman kal mekah tun thla ni 3 thleng khan SCC 10 atangin sawhthing cheng nuai 187.49 man hralh niin, sorkarin support price a pek tur nen chuan a vaiin cheng nuai 294.35 man a ni.

Mizoram Agriculture Marketing Board (MAMB) hotute hnen atanga Akashvani Aizawl thudawn danin, sawhthing hralhna hmun tur bika ruahman SCC 64 zinga SCC 10-ah sumdawngten kut hnathawktute sawhthing an lei tawh a, heng SCC 64-a sawhthing awm zat tura tarlan chu quintal nuai 3 sing 4 & 6,470 niin, tuna sumdawngten an lei tawh zat hi a vaiin quintal 5,887 a ni.

MAMB-in support price awma sawhthing hralh theih hun tura a bituk chu February 2 - May 30 thleng a ni a; February 2 atanga tun thla ni 3 thleng khan SCC 10-ah hian kut hnathawktuten sawhthing sumdawngten an lei hi cheng nuai 187.49 man niin, sorkarin ba awm loa lei tura sumdawngte a tih angin sumdawngte hian an sawhthing leina man hi kut hnathawktute hnenah an pe vek tawh a; heng SCC 10-ah hian sumdawngte hian sawhthing hi kg khat cheng 30 atanga cheng 35 inkarin an lei a ni.

Sorkarin support price a pek tur hi sawhthing hralh zawh huna pek chhuah tur niin, support price an la hmuh tur hi cheng nuai 106,86 a ni a; tuna sumdawngte hnen atanga sawhthing hralhna an hmuh tawh leh sorkar atanga kut hnathawktuten support price an hmuh tur hi belhkhawmin cheng nuai 294.35 a tling tawh a ni.



PM WITH FRENCH PRESIDENT

Prime Minister Narendra Modia chuan nimin khan French President Emanuel Macron nen inbiain tunlai khawvel thilthleng mek an sawidun. Social Media lama a tarlan danin Pu Modia leh President Macron te hian Asia khawthlang lama indona thleng mek chu a rang lama dawhkana inbiaa chinfel a tul thu an sawi a. Ram pahnihte hian remna leh muanna a awm theih nan theihtawp chhuah chhonzawm zel an tum thu an sawi dun a ni.

Hetihlai hian External Affairs Minister Dr.S.Jaishankar-a chuan nimin chawhnu khan Iran Foreign Minister Seyed Abbas Araghchi a bia a. Pu Jaishankara hian Oman Foreign Minister Sayyid Badr bin Hamad bin Hamood Albusaidi be bawkin tunlai Asia khawthlang boruak thleng mek an sawiho a ni.



PM

Prime Minister Narendra Modia chuan nimin khan New Delhi-ah Raisina Dialogue vawi 11 na a hawng. He hunah hian Finland President Dr.Alexander Stubb chuan keynote address sawiin khawvel chhimlam ram Global South te chuan khawvel pum kalphung an la rel dawn tih sawiin India chuan dinhmun pawimawh tak a luah dawn a ni a ti a. Dr.Stubbs-a chaun India kum sang khat chhunga alo ngaihhlut tawh thilte hmangin khawvel kalphung a her danglam mek a ti a. United Nations-ah pawh siamthat hna thawktu ram pawimawh tak a ni mek a ni a ti a. India chuan UN Security Council ah permanent seat a chang ngei tur a ni tih a sawi bawk a ni.

<><><>